



# Հովհաննես Թումանյան

## Երկու հոգի

Մարդիկ կյանքում իրար համար  
Ամեն մի տեղ ու ամեն օր՝  
Որը ուժեղ, որը տրկար՝  
Կամ պաշտպան են կամ պրոկուրոր:

Մինը գիտի լոկ չար վայրկյան  
Եվ չարագործ ու թըշնամի,  
Մյուսը հոգին հավերժական  
Ու պատճառը դժբախտ ժամի:

Մինն իր առջև տեսնում է ցած

Մի հանցավոր խավար ու կույր,  
Մյուսը՝ իր պես մի արարած,  
Ծընող, որդի, եղբայր կամ քույր...

Մինը մարդու օրենքն ունի,  
Որ միշտ մարդուն ցավ է բերում,

Մյուսը մարդու և Անհունի,  
Որ և անհուն սեր է բուրում:

Եվ օրհնեալ է, ով այդ սիրով  
Կյանքի ճամփում ընկնող մարդուն  
Պաշտպանում է եղբոր ձեռով,

Տանում դեպի խաղաղություն:

Եվ խաղաղ է նրա հոգին  
Կյանքի ամեն ասպարիզում,  
Եվ թե երբեք հուզվում է նա,  
Սերն է միայն նրան հուզում:

Ահա ինչու էս աշխարհքում  
Խաղաղ է միշտ և իմ հոգին,  
Պաշտպանում է նա իր խորքում,  
Սիրում է ողջ ու ամենքին:

1912

---